



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Suai
Jullu 2020

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza hamutuk: 32

Artigu sira	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	10
Artigu 172 KP	Violasaun seksuál	2
Artigu 177 (1) KP	Abuzu seksuál ba menór	2
Artigu 143 KP	Expozisaun ka abandonu	1
Artigu 23, 172 KP	Tentativa violasaun seksuál	1
Artigu 154 KP	Maus-tratus ba konjúje	2
Artigu 145 KP konjuga ho artigu 2, 3, no 35(b) no 36 (LKVD) no Artigu 157 KP	Ofensa ba integridade fízika simples ho natureza violénsia doméstika no ameasa	1
Artigu 146 KP	Ofensa ba integridade fízika grave	1
Artigu 267 KP	Burla agravada	1
Artigu 285 KP	Denúnsia kalunioza	1
Artigu 258, 260 KP (KP), Artigu 1, 2 nú. 20, nú. 1 Lei Nú. 5/2017	Danu simples, danu ho violénsia no arma brankas	1
Artigu 253 KP	Roubu	1

Artigu 145 KP	Ofensa ba integridade fízika simples	2
Artigu 151 KP	Ofensa korporál resíproka	1
Artigu 316 KP	Kontrabandu	6
Artigu 154 KP	Maus-tratus ba kónjuje	1
Artigu 316 KP	Kontrabandu	1
Totál		32

2. Totál desizaun ne'ebé JSMP monitoriza: 14

Tipu desizaun	Artigu sira	Númeru
Suspensaun ba prizaun nia ezekusaun	Artigu 68 KP	10
Pena prizaun	Artigu 66 KP	1
Pena multa	Artigu 67 KP	4
Pena admoestasaun	Artigu 82 KP	1
Suspensaun ba prizaun nia ezekusaun no omologa	Artigu 68 KP	1
Suspensaun ba prizaun nia ezekusaun no absolve	Artigu 68 KP	1
Absolve		3
Omologa		1
Totál		22

3. Totál kazu sira ne'ebé adia tuir JSMP monitorizasaun: 2

Razaun adiamentu	Númeru
Sei buka tradutór ba jestu tanba arguidu ema defisiénsia tilun no la hatene ko'alia	1
Parte sira notifika maibé la marka prezensa	1
Totál	2

4. Total kazu sira ne'ebé sei kontinua prosesu tuir JSMP nia monitorizasaun: 8

B. Deskrisaun sumáriu julgamentu ba desizaun kazu sira ne'ebé JSMP monitoriza:

1. Krime tentativa violasaun seksuál

Nú. Prosesu : 0025/16 BBLB

Kompozisaun Tribunál : Singulár

Juis : Dra. Ersilia de Jesus

Prokuradór : Dr. Gustavo A. da Silva Moreira

Defeza : Dr. José da Silva
Desizaun : Absolve

Iha 01 Jullu 2020, Tribunál Distritál Suai prezide julgamentu leitura akordaun ba krime tentativa violasaun seksuál ne'ebé envolve arguidu RS hasoru lezada nu'udar nia kuñada, iha Munisípiu Bobonaro.

Akuzasaun Prokuradór

Prokuradór akuza arguidu katak iha 20 Novembru 2016, iha oras tuku 09:00 dadeer, arguidu ho motorizada husi Balibo atu ba Maliana maibé momentu liu iha lezada nia uma oin iha Aldeia Rai-fatuk, Balibo, arguidu para nia motorizada no la'o ba iha lezada nia uma. To'o iha lezada nia uma, arguidu haree lezada tuur hela iha baranda. Arguidu mós husu ba lezada dehan "*ó nia la'en ba ne'ebé?*" lezada hatan katak ba ona serbisu iha Dili. Arguidu kontinua husu dehan "*se-se mak iha uma?*". Lezada hatan katak "hau ho alin ida maibé alin ne'e moras no toba iha uma laran". Arguidu hateten ba lezada katak "*haruka alin ne'e sai tiha para ita rua toba*". Rona arguidu nia liafuan ne'e, lezada hirus no duni sai arguidu. Arguidu mós foti nia motorizada ba liu Maliana.

Maizumenus iha oras tuku 12:00 meiodia, arguidu filafali husi Maliana no arguidu nafatin ba iha lezada nia uma. To'o iha lezada nia uma, arguidu haree lezada tuur hela iha baranda. Arguidu rai tiha nia pasta iha baranda no tama liu ba iha lezada nia uma laran. Arguidu kolu tiha nia kalsa no kalsa laran to'o iha ain-tuur no arguidu lori nia liman sorin kaer lezada nia liman no liman sorin loos foti osan US\$10.00 iha kalsa bolsu no soe ba rai no hateten ba lezada dehan "osan mak ne'e mai ita halo relasaun seksuál.

Lezada mós nonook de'it no koko bosok arguidu hodi husu tan arguidu dehan "*ó fó-tan dolar ida lai para hau fó ba labarik ne'ebé moras toba iha uma laran ne'e, sai tiha ba hola supermi para la haree ita*". Arguidu mós husik lezada nia liman no foti tan osan dolar ida no soe ba rai no lezada aproveita foti hotu arguidu nia osan US\$11.00 ne'e no halai ba informa kedas akontesimentu ne'e ba nia kuiñada ne'ebé hela besik no ba hato'o keixa iha polísia.

Prokuradór akuza arguidu kontra artigu 172 KP kona-ba violasaun konjuga ho artigu 23 KP kona-ba tentativa.

Produsaun ba prova sira

Iha julgamentu, arguidu deklara parsialmente katak faktu balun loos balun laloos. Arguidu konfirma katak iha 20 Novembru 2016, iha oras tuku 09:00 dadeer, arguidu ba Maliana no liuhusi lezada nia uma no husu duni lezada nia la'en ba lezada no lezada hatan katak ba ona serbisu iha Dili. Arguidu mós konfirma katak nia fó duni

osan US\$11.00 ba lezada maibé lezada husu fali ba arguidu katak osan ne'e atu halo saida. Arguidu hatan ba lezada katak "ó mak hatene de'it ona". Arguidu hatutan tan katak nia apenas ko'alia de'it liafuan ne'e ba lezada maibé arguidu la kolu nia kalsa no la hateten lia-fuan dehan "ita halo relasaun seksuál".

Liutan arguidu deklarata katak tanba de'it osan US\$11.00 no ko'alia lia-fuan ba lezada dehan "ó mak hatene ona", sira konsege tuur hamutuk hodi rezolve liuhusi dalan familiar no fó sala ba arguidu US\$800 ne'ebé selu ba lezada nia família.

Entretantu lezada kontinua konfirma hotu faktu sira iha akuzasaun prokuradór nian no konfirma mós ho deklarasaun arguidu nian katak sira rezolve ona problema ne'e liuhusi dalan familiar no fó sala arguidu US\$800.

Testemuña VdS nu'udar vitima nia kuñada ne'ebé hela besik vítima depoimenta katak nia la haree ho matan kona-ba akontesimentu ne'e maibé iha 20 Novembru 2016, maizumenus iha oras tuku 12:00 meiodia, lezada ho tanis ba iha nia uma no informa ba testemuña katak arguidu fó osan ba lezada no hateten ba lezada atu halo relasaun seksuál. Testemuña depoimenta tan katak lezada mós informa ba testemuña katak arguidu kolu nia kalsa no kalsa laran to'o ain-tuur. Hafoin rona ne'e hotu, lezada sae ojek ba apresenta kedas keixa iha polísia.

Alegasaun finál

Prokuradór haktuir katak mezmú arguidu nega faktu esensial sira maibé lezada no testemuña konfirma akuzasaun prokuradór nian. Aleinde ne'e, haktuir mós katak arguidu nu'udar funsionáriu públiku iha Ministériu Edukasaun ne'ebé tuir loloos iha kapasidade no komprensaun di'ak atu evita krime ne'e maibé pelu kontráriu, arguidu mak halo fali aktu ne'e hasoru lezada. Tanba ne'e, husu ba tribunál atu kondena arguidu ho pena prizaun tinan tolu suspende ba tinan tolu.

Enkuantu defeza konsidera prova ne'e la sufisiente tanba prova husi de'it arguidu no lezada. Aleinde ne'e, prova sira ne'e mos kontráriu ba malu. Arguidu nega, lezada konfirma no testemuña la haree ho matan. Testemuña konta filafali de'it saida mak lezada fó hatene. Ho nune'e, husu ba tribunál atu absolve arguidu husi krime ne'e. Maibé kuandu tribunál intende seluk, husu atu altera krime ne'e ba fali krime ezibisionizmu seksuál tuir artigu 181 KP tanba arguidu hatudu nia orgaun seksuál ba lezada.

Desizaun

Depoisde avalia faktu sira hotu, tribunál konsidera aktu ne'e la prenxe rekizitu sira husi krime tentativa violasaun. Tribunál bazeia ba arguidu nia deklarasaun katak la kolu nia kalsa no kalsa laran no hatudu nia orgaun seksuál ba lezada. Aleinde ne'e, la

kaer lezada nia liman. Arguidu rekoñese katak nia fó duni osan US\$11.00 ba lezada no ko'alia ba lezada dehan “ó mak hatene deit ba”.

Tribunál konsidera katak mezmu lezada kontinua konfirma faktu sira iha akuzasaun maibé laiha tan prova seluk ne'ebé bele reforsa lezada nia deklarasaun katak arguidu tenta atu halo violasaun hasoru lezada. Testemuña rasik la haree ho matan no konta tuir de'it lezada nia liafuan ne'ebé lezada konta ba nia.

Ho nune'e tribunál konsidera katak laiha prova ne'ebé suficiente atu kondena arguidu tanba prova sira hamosu dúvida ba tribunál. Ho konsiderasaun ne'e, tribunál konklui prosesu ne'e no absolve arguidu husi krime ne'e.

2. Krime ofensa ba integridade fízika simples ho natureza violénsia doméstika

Nú. Prosesu : 0075/19. BBMLV
Kompozisaun Tribunál : Singulár
Juis : Dr. Álvaro Maria Freitas
Prokuradór : Dr. Napoleão Soares da Silva
Defeza : Dr. Manuel Amaral
Desizaun : Pena prizaun fulan 1 suspende ba tinan 1

Iha 06 Jullu 2020, Tribunál Distritál Suai liuhusi julgamentu movel iha Maliana prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida ELE hasoru nia eis la'en, iha Munisípiu Bobonaro.

Akuzasaun Prokuradór

Prokuradór akuza katak arguida no lezadu separa ona. Lezadu ba hela tiha iha uma seluk no arguida kontinua hela iha sira nia uma. Maibé iha 10 Juñu 2019, iha oras tuku 11:00 meiodia, lezadu ba fali iha sira nia uma atu salin hare ne'ebé nia rai iha ne'ebá. Haree lezadu, arguida ELE la kontente no ba bolu arguidu JM ho arguidu MBT nu'udar arguida nia naan ba iha nia uma hodi baku lisuk lezadu. Arguidu JM tuku dala tolu iha lezadu nia hasan parte karuk, arguidu MBT basa dala ida iha lezadu nia hasan parte loos, entretantu arguida ELE tuku dala rua iha lezadu nia ulun parte kotuk. Aktu hirak ne'e rezulta lezadu sofre bubu, mean no moras iha hasan parte karuk, loos no ulun parte kotuk.

Prokuradór akuza arguidu JM no MBT kontra artigu 145 KP kona-ba ofensa integridade fízika simples ho moldura penál to'o tinan 3 ka multa. Entretantu arguida ELE prokuradór akuza kontra artigu 145 KP kona-ba ofensa integridade fízika simples ho moldura penál to'o tinan 3 ka multa no konjuga ho artigu 2(a), 3(a), 35(b) no 36 LKVD.

Antes tama ba produsaun ba prova sira, tribunál halo tentativa konsiliaun ba lezadu no arguidu JM no MBT tanba krime ofensa ba integridade fízika simples nu'udar krime semi-públiku. Iha prosesu tentativa konsiliaun ne'e lezadu hakarak atu deziste tiha ninia keixa hasoru arguidu JM no MBT tanba sira sei iha relasaun família ka arguidu sira hanesan lezadu nia eis rian. Entretantu ba krime ofensa ba integridade fízika simples ho natureza violénsia doméstika ne'ebé komete husi arguida ELE, tribunál kontinua halo prosesu julgamentu tanba krime violénsia doméstika nu'udar krime públiku.

Produsaun ba prova sira

Iha julgamentu, arguida konfesa integralmente ba faktu sira iha akuzasaun no deklara mós katak antes ne'e lezadu sempre trata aat arguida kuandu lezadu mai iha sira nia uma.

Aleinde ne'e, lezadu deklara katak arguida tuku dala tolu iha lezadu nia ulun la'os tuku dala rua hanesan mensiona iha akuzasaun no daudaun ne'e sira nafatin hela separadu.

Alegasaun finál

Prokuradór haktuir katak iha produsaun ba prova sira, arguida konfesa integralmente ba faktu iha akuzasaun. Tanba ne'e, arguida nia aktu ne'e prenze duni elementu krime tuir akuzasaun prokuradór nian. Bazeia ba konsiderasaun ne'e, husu ba tribunál atu kondena arguida ho pena prizaun fulan tolu suspende ba tinan ida.

Entretantu defeza konsidera arguida konfesa integralmente ba faktu sira iha akuzasaun, haree mós sirkunstánsia sira no artigu 62 KP kona-ba hili pena no medida ba seguransa. Nune'e, husu ba tribunál atu aplika pena multa.

Desizaun

Depoisde tetu ba faktu sira hotu, tribunál prova katak arguida tuku dala rua iha lezadu nia ulun parte kotuk. Bazeia ba prova sira ne'e no mós tetu ba sirkunstánsia sira, nune'e tribunál konklui prosesu ne'e no kondena arguida ho pena prizaun fulan ida suspende ba tinan ida.

3. Krime ofensa ba integridade fízika simples ho natureza violénsia doméstika no ameasa

Nú. Prosesu	: 0127 /19. BBMLV
Kompozisaun Tribunál	: Singulár
Juis	: Dr. Álvaro Maria Freitas
Prokuradór	: Dr. Napoleão Soares da Silva
Defeza	: Dr. Manuel Amaral

Desizaun : Pena prizaun fulan 1 suspende ba tinan 1 no omologa dezisténsia keixa

Iha 06 Jullu 2020, Tribunál Distrital Suai liuhusi julgamentu movel iha Maliana prezide julgamentu leitura sentensa ba krime ofansa ba integridade fízika simples ho natureza violénsia doméstika ne'ebé envolve arguidu FS hasoru nia eis feen, iha Munisípiu Bobonaro.

Akuzasaun Prokuradór

Prokuradór akuza katak iha 13 Agostu 2019, arguidu liuhusi *WhatsApp* haruka mensajen ba lezada no ameasa lezada atu ko'a sai lezada no mane seluk nia orgaun seksuál. Ho nune'e, iha 15 Agostu 2019, lezada ba hato'o keixa iha Komando Polísia Bobonaro no hafoin ne'e lezada fila ba nia uma ho *ojek*. Maibé arguidu ho motorizada duni tuir no toman lezada iha área Tapo/Memo nian. Arguidu rasta lezada nia pasta ne'ebé tara iha lezada nia kotuk halo lezada monu tun ba rai rezulta ain-tuur naksalak no moras iha kabun parte loos. Aleinde ne'e, halo lezada sente ta'uk no trauma.

Prokuradór akuza arguidu kontra artigu 145 KP kona-ba ofensa integridade fízika simples ho moldura penál to'o tinan 3 ka multa, konjuga ho artigu 2(a), 3(b), 35(b) no 36 LKVD. Prokuradór mós akuza arguidu kontra artigu 157 KP kona-ba ameasa ho moldura penál to'o tinan 1 ka multa.

Produsaun ba prova sira

Bazeia ba artigu 262 KPP, antes tama ba produsaun ba prova sira, tribunál halo tentativa konsiliaun ba krime ameasa tanba krime ne'e ho natureza semi públiku. Iha prosesu konsiliaun ne'e, lezada hakarak deziste tiha nia keixa hasoru arguidu. Entretantu tribunál kontinua halo prosesu julgamentu ba krime ofensa ba integridade fízika simples tanba ho natureza violénsia doméstika.

Iha julgamentu, arguidu konfesa parsialmente no deklara katak lezada la monu ba rai maibé bainhira arguidu rasta lezada nia pasta no hadau lezada nia telemovel mak motorizada monu no roda kona iha lezada nia ain. Arguidu mós deklara katak antes ne'e, lezada *chatting* (haruka mensajen) ba mane seluk no hatete ba arguidu katak lezada ho mane ne'e sala malu ona nune'e mak arguidu duni lezada ba fali nia família.

Relasiona ho edit lezada nia foto (lezada nia deklarasaun), depoisde tribunál konfirma ho arguidu, arguidu rekoñese katak nia mak *edit* lezada nia oin no tau fali ba ema seluk nia isin ne'ebé hatais bikini no manda ba iha lezada. Maibé arguidu promete sei

apaga tiha fotografia refere no sei la komete tan hahalok ne'e iha futuru no mós daudaun ne'e arguidu iha ona feen ki'ik.

Entretantu, lezada kontinua konfirma faktu sira iha akuzasaun prokuradór nian no deklara katak lezada nia ain parte loos kanek, ain-kabun no ain-tuur parte loos bubu maka'as, moras no naksalak halo la bele sama rai ho di'ak. Lezada mós konfirma sira hela separadu ona no arguidu hola ona feto seluk. Aleinde ne'e, lezada hatutan katak arguidu edit nia foto iha parte oin no tau fali ba feto seluk nia isin ne'ebé hatais de'it *bikini*.

Alegasaun finál

Prokuradór haktuir katak maski arguidu deklara parsialmente katak faktu balun loos no balun la loos maibé lezada kontinua konfirma faktu sira. Aleinde ne'e, relatóriu médiku mós hatudu katak lezada sofre moras iha ain kabun no naksalak iha ain-tuur, nune'e husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak lezada monu no roda motor mak kona lezada nia ain nune'e, defeza laiha dúvida katak lezada sofre duni moras no mós haree ba sirkunstánsia sira hanesan antes akontesimentu ne'e, lezada iha relasaun amante ho mane seluk, arguidu konfesa maski parsial, arrepende ona ninia hahalok, foin primeiravés mai hatan iha tribunál no promete sei la komete tan hahalok ne'e iha futuru, husu ba tribunál atu aplika pena ne'ebé kmaan ba arguidu.

Desizaun

Depoide avalia ba faktu sira hotu, tribunál prova katak arguidu dada lezada nia pasta no halo lezada monu tun ba rai. Bazeia ba faktu provadu sira ne'e no tetu mós ba sirkunstánsia atenuante no agravante ne'ebé iha, nune'e tribunál kondena arguidu ho pena prizaun fulan ida suspende ba tinan ida.

4. Krime ofensa korporál resíproka

Nú. Prosesu : 0203/19. BBMLV apensu 0201/19. BBMLV
Kompozisaun Tribunál : Singulár
Juis : Dr. Eusébio Xavier Víctor
Prokuradór : Dr. João Marques
Defeza : Dr. Francisco Caetano Martins
Desizaun : Omologa dezisténsia keixa

Iha 09 Jullu 2020, Tribunál Distrital Suai liuhusi julgamentu movel iha Maliana prezide julgamentu tentativa konsiliausaun ba krime ofensa korporál resíproka ne'ebé envolve

LdC nu'udar arguidu no mós lezadu no AMG nu'udar arguida no mós lezada (feen o la'en), iha Munisipíu Bobonaro.

Akuzasaun Prokuradór

Prokuradór akuza katak iha 23 Agostu 2017, iha oras tuku 11:30 dadeer, lezada ka'er arguidu nia telemovel no haree fotografia sira ne'ebé arguidu rai iha telemovel no entre fotografia sira ne'e, iha feto ida (IB) nia foto nune'e lezada apaga tiha foto refere. Nune'e, arguidu nervozu no basa dala ida iha lezada nia hasan parte loos, lezada hases-an no halai sai husi kuartu laran hodi ba subar iha kuartu seluk.

Tuir mai, iha 17 Setembru 2018, iha oras tuku 16:00 lokraik, lezada no arguidu kontinua diskute malu tanba lezada deskonfia arguidu iha relasaun amante ho feto seluk no lezada husu tuir arguidu maibé arguidu la ko'alia loloos ba lezada no arguidu basa dala haat iha lezada nia ulun no hasan.

Iha 21 Dezembru 2018, iha oras tuku 17:00 lokraik, lezada nafatin husu ba arguidu kona-ba feto ne'ebé nia sempre tula maibé arguidu hatan ba lezada katak sira laiha relasaun ruma, husi ne'e sira diskute malu no arguidu tuku dala ida iha lezada nia hirus-matan, tebe dala ida iha kotuk laran no tenta lori besi kanu atu baku lezada maibé la konsege tanba lezada halai sees tiha.

Iha 02 Janeiru 2019, iha oras tuku 09:00 dadeer, arguidu fila husi Hauba-Bobonaro, kuandu to'o iha uma, arguidu ho lezada diskute malu kedas. Lezada hirus arguidu tanba tuir loloos iha loron boot arguidu hamutuk ho nia feen no oan sira iha uma, la'os ba hamutuk fali ho nia família ka inan-aman iha Hauba-Bobonaro. Ho nune'e, arguidu tuku dala rua iha lezada nia ulun halo lezada monu tun ba rai.

Enkuantu iha 15 Novembru 2019, iha oras tuku 07:00 dadeer, arguidu ho lezada diskute malu kona-ba sira nia oan ne'ebé remata ona eskola sekundária no atu kontinua estuda iha universidade. Husi diskute malu ne'e arguidu silu lezada nia liman rua ba kotuk rezulta moras.

Prokuradór akuza arguidu no arguida kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu ho artigu 2(a), 3(b) no 35(b) LKVD.

Produsaun ba prova sira

Iha julgamentu, arguidu deklara parsialmente ba iha akontesimentu primeiru no segundu katak sira diskute malu duni maibé la basa lezada. Arguidu hatutan katak

fotografia sira ne'e nu'udar atividade eskola nian no kuandu arguidu haree fotografia sira ne'e balun laiha ona nune'e arguidu husu ba lezada.

Kona-ba arguidu sempre tula feto, arguidu deklar katak dala ruma arguidu tula IB bainhira sira sai eskola iha lokraik no laiha ona transporte. Arguidu mos deklar katak arguidu no IB hanesan fundador ba Asosiasaun Eskola no nu'udar kolega serbisu. Akontesimentu iha 02 Janeiru 2019, arguidu deklar katak nia ba duni nia familia tanba atu halo lia (hafolin nia aman ki'ik nia feen). Kuandu arguidu fila mai uma sira diskute malu kedas no lezada mak tuda arguidu maibe arguidu la halo asaun ruma. Arguidu mos deklar katak iha Jullu 2019, arguidu sai husi uma no la fo hatene lezada tanba arguidu atu prevene mosu tan problema.

Arguidu deklar mos katak iha 15 Novembru 2019, bainhira arguidu fila ba uma, lezada mak lori kadeira baku arguidu, nune'e arguidu ba apresenta keixa. Arguidu rejita faktu sira ne'ebé dehan katak halo agresaun hasoru lezada.

Entretantu, lezada kontinua konfirma faktu sira iha akuzasaun prokurador nian katak iha akontesimentu primeiru, lezada haree foto sira iha arguidu nia telemovel no lezada husu ba arguidu. Iha tempu hanesan lezada kaer arguidu nia faru no rakut arguidu hafoin ne'e mak arguidu basa dala ida iha hasan parte loos.

Enkuantu akontesimentu iha 17 Setembru 2018, lezada konfirma katak arguidu basa duni lezada iha hasan no ulun maibe tanba lezada rakut uluk arguidu. Lezada mos konfirma katak akontesimentu iha 21 Dezembru 2018, arguidu so basa no lori besi kanu atu baku lezada maibe la konsege tanba lezada halai tiha ba viziñu sira. Kona-ba akontesimentu iha 02 Janeiru 2019 no 15 Novembru 2019, lezada konfirma faktu sira iha akuzasaun.

Lezada haktuir katak maski sira sempre iha problema tanba nervozu maibe depoisde liu tiha oras ida ka rua sira di'ak malu fali. Lezada mos deklar katak depoisde akontesimentu ikus ne'e, lezada ba hela tiha iha Uma Mahon durante loron ida no agora sira di'ak malu ona.

Alegasaun final

Prokurador haktuir katak arguidu nega faktu sira ne'ebé prokurador imputa ba nia no lezada konfirma katak sira baku malu no di'ak malu lalais fali. Entretantu iha prosesu seluk lezada sai hanesan arguida no arguidu sai fali hanesan lezadu. Nune'e, husu ba tribunál atu halo alterasaun husi artigu 154 kona-ba maus-tratus ba konjuje ba fali artigu 151 kona-ba ofensa korporál resiproka.

Entretantu defeza laiha opsaun no konkorda ho prokuradór nia alegasaun.

Depoisde alegasaun ne'e, tribunál imediata halo alterasaun ba kualifikasaun jurídiku no tribunál apensu (akumula) prosesu rua husi arguidu no lezada. Ho nune'e, tribunál halo alterasaun ba kualifikasaun jurídiku husi artigu 154 KP kona-ba maus-tratus ba kónjújé ba fali artigu 151 KP kona-ba ofensa korporál resíproka.

Bazeia ba artigu 262 KPP, tribunál halo tentativa konsiliausaun ba sira na'in rua tanba krime ofensa korporál resíproka ho natureza semi-públiku. Iha prosesu tentativa konsiliausaun ne'e lezada iha tempu hanesan mós nu'udar arguida, nune'e mós lezadu no iha tempu hanesan nu'udar arguidu deklara katak hakarak atu deziste tiha sira nia keixa.

Desizaun

Depoisde avalia faktu sira, tribunál la prova arguidu komete krime maus-tratus hasoru lezada. Tribunál konsidera ida ne'e bazeia ba lezada nia deklarasaun. Tanba ne'e, tribunál halo alterasaun kualifikasaun jurídiku husi artigu 154 KP ba fali artigu 151 KP no konsidera arguidu no lezada nia pedidu kona-ba dezisténsia keixa, nune'e tribunál absolve arguidu no arguida.

5. Krime ofensa ba integridade fízika simples ho natureza violénsia doméstika

Nú. Prosesu : 0070 /19. BBMLV
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. João Marques
Defeza : Dr. Francisco Caetano Martins
Desizaun : Pena prizaun fulan 3 suspende ba tinan 1

Iha 10 Jullu 2020, Tribunál Distritál Suai liuhusi julgamentu movel iha Maliana prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida VdA hasoru lezadu nu'udar nia aman haki'ak, iha Munisípiu Bobonaro.

Akuzasaun Prokuradór

Prokuradór akuza katak iha 27 Maiu 2019, iha oras tuku 06:30 dadeer, arguida rakut lezadu nia kakorok, rakut iha hasan parte karuk no parte loos no basa dala ida iha lezadu nia hasan parte karuk. Aktu hirak ne'e rezulta kanek iha kakorok no hasan parte karuk no loos. Antes agresaun ne'e, lezadu fila husi igreja no bainhira tama ba uma laran, lezadu haree ba arguida, nune'e arguida husu ba lezadu "*nu'usá mak ó*

halo oin boot ne'e?". Lezadu hatan fali dehan "*be nu'usá, ó atu baku hau ka?*" no arguida halo kedas agresaun refere hasoru lezadu.

Prokuradór akuza arguida kontra artigu 145 KP kona-ba ofensa integridade fízika simples ho moldura penál to'o tinan 3 ka multa, konjuga ho artigu 2(a), 3(c), 35(b) no 36 LKVD.

Produsaun ba prova sira

Iha julgamentu, arguida konfesa ninia hahalok no deklarata katak antes ne'e lezadu ho nia feen ka arguida nia inan haki'ak iha ona problema no momentu lezadu fila husi igreja, lezadu fihir ba arguida. Nune'e arguidu husu hanesan haktuir iha akuzasaun. Arguida mós deklarata katak lezadu mak basa uluk dala ida iha arguida nia hasan parte loos no tebe lezada nia kabun hafoin arguida rakut lezadu. Momentu akontesimentu ne'e arguida grávida fulan 6 maibé agora di'ak malu ona no kona-ba lezadu basa no tebe arguida, arguida la ba apresenta keixa hasoru lezadu.

Aleinde ne'e, lezadu mós kontinua konfirma faktu sira iha akuzasaun no deklarata mós katak lezadu basa no tebe duni arguida maibé la kona tanba NdJ (arguida nia primu) hafahe tiha sira. Bainhira hafahe ne'e mak arguida rakut lezadu to'o kanek, maibé la basa lezadu. Lezadu hatutan katak agora sira di'ak malu ona.

Testemuña NdJ nu'udar arguida nia primu depoimenta katak lezadu basa arguida nia hasan no tebe arguida nia kabun nune'e testemuña ba hafahe sira mak lezadu rakut iha arguida nia fuuk no arguida mós rakut iha lezadu nia hasan to'o raan sai.

Alegasaun finál

Prokuradór haktuir katak arguida konfesa parsialmente ba faktu sira iha akuzasaun katak bainhira lezadu fila husi igreja, lezadu halo agresaun hasoru arguida. Nune'e arguida rakut lezadu maibé la basa lezadu. Faktu hirak ne'e, konfirma mós husi testemuña. Aleinde ne'e, sira iha relasaun hanesan aman haki'ak ho oan haki'ak no ekonomikamente iha dependénsia ba malu. Hahalok arguida nian ne'e preense duni elementu krime husi ofensa ba integridade fízika simples. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza husu ba tribunál atu absolve arguida husi akuzasaun ne'e maibé karik tribunál iha hanoin seluk, defeza laiha opsaun no husu atu kondena arguida tuir konviksaun tribunál nian ho konsiderasaun katak lezadu mak halo uluk agresaun hasoru arguida ne'ebé iha kondisaun grávida. Defeza mós haree katak hahalok arguida nian ne'e konsidera hanesan emosaun husi ema ne'ebé iha kondisaun

grávida hela. Aleinde ne'e defeza konsidera arguida nia hahalok ne'e mós hanesan lejítima defeza.

Desizaun

Depoisde avalia faktu sira hotu, tribunál prova katak arguida baku no rakut lezadu, maski nune'e tribunál konsidera liu ba arguida nia deklarasaun iha prokuradór nian ne'ebé haktuir katak arguida mak halo hahalok hasoru lezadu sein lezadu halo aksaun hasoru arguida. Tribunál mós tetu ba sirkunstánsia hanesan di'ak malu ona, arguida foin primeiravés mai hatan iha tribunál, nune'e tribunál deside kondena arguida ho pena prizaun fulan tolu suspende ba tinan ida.

6. Krime kontrabandu

Nú. Prosesu : 0029/16 BBBGD
Kompozisaun Tribunál : Koletivu
Juis : Dr. José Maria de Araujo, Dr. Naason Mário Armindo
Marques no Dr. Benjamin Barros
Prokuradór : Dr. Nelson José Soares Magno
Defeza : Dr. Francisco Caetano Martins
Desizaun : Pena prizaun tinan 2 suspende ba tinan 2

Iha 10 Jullu 2020, Tribunál Distritál Suai prezide leitura akordaun ba krime kontrabandu ne'ebé envolve arguida RM no CB hasoru Estadu RDTL, iha Munisípiu Covalima.

Akuzsaun Prokuradór

Prokuradór akuza katak iha 09 Setembru 2016, iha oras tuku 00:00 kalan, iha tasi-ibun área Batugadé nian, arguida sira sosa minarai litru 20 hamutuk masa *jerigen* 17 no litru 10 hamutuk masa *jerigen* 10 ho folin US\$297.00 husi Sr. Karo, sidadaun Indonezia. Bainhira arguida sira tula mina ba iha karosa atu dudu ba uma mak polísia UPF sira toman no halo kedas aprensaun ba mina sira ne'e no detein kedas arguida sira iha sela polísia Batugedé.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 priaun.

Produsaun ba prova sira

Iha prosesu julgamentu, arguida sira konsidera katak faktu sira iha akuzasaun loos hotu. Arguidu sira mós deklara katak arrepende sira ninia hahalok no promete sei la komete tan hahalok ne'e iha futuru. Arguida sira hatutan katak sira halo atividade ne'e atu sustenta família tanba sira laiha serbisu.

Alegsaun finál

Prokuradór konsidera arguida sira provadu komete krime kontrabandu tuir faktu sira iha akuzasaun sein iha lisensa nune'e la selu taxa ba Estadu no fó prezuiju ba Estadu. Tanba ne'e, husu ba tribunal atu kondena arguidu sira ho pena multa.

Entretantu, defeza husu bá tribunal atu konsidera arguida sira nia konfisaun ba faktu sira, hatudu arependimentu, primeiravés hatan iha tribunál no arguida sira halo atividade ne'e tanba laiha rendimentu atu sustenta família. Bazeia ba konsiderasaun sira ne'e husu ba tribunál atu fó justisa.

Desizaun

Tribunál prova katak arguida sira hatama minarai litru 20 hamutuk masa *jerigen* 17 no litru 10 hamutuk masa *jerigen* 10 mai Timor-Leste ho dalan ilegál. Arguida sira ninia hahalok ne'e fó prejuizu ba Estadu tanba sira la selu taxa liuhusi Diresaun Alfandega. Bazeia ba faktu provadu sira ne'e no tetu mós ho sirkunstánsia sira hotu, tribunál konklui no kondena arguida sira ho pena prizaun tinan rua suspende ba tinan rua no dekreta objetu aprendidu sira ne'e afavór ba Estadu.

7. Krime maus-tratus ba kónjuje

Nú. Prosesu : 0007/18. BBBLB
Kompozisaun Tribunál : Koletivu
Juis : Dr. Naason Mário Armindo Marques Doutel, Dr. José M. de Araujo no Dr. Benjamin Barros
Prokuradór : Dr. Nelson José Soares Magno
Defeza : Dr. Francisco Caetano Martins
Desizaun : Pena prizaun tinan 2 suspende ba tinan 2

Iha 17 Jullu 2020, Tribunál Distritál Suai prezide julgamentu leitura akordaun ba krime maus-tratus ba kónjuje ne'ebé envolve arguidu IP hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 14 Marsu 2018, iha oras tuku 03:00 dadeer, arguidu basa dala ida iha lezada nia hasan parte karuk, tuku dala ida iha lezada nia liman kabun parte loos no tebe dala ida iha lezada nia kelen parte karuk. Antes ne'e, arguidu mehi katak lezada sai husi uma iha kalan boot. Nune'e, arguidu hakfodak husi mehi ne'e no komete kedas krime hirak ne'e. Aktu sira ne'e rezulta moras iha lezada nia hasan, liman kabun no kelen moras maibé lezada la ba hato'o keixa.

Tuir fali, iha 17 Marsu 2018, oras tuku 01:00 kalan, arguidu nafatin deskonfia lezada loke odamatan no ba hasoru mane seluk, nune'e arguidu rakut lezada nia fuuk, dudu lezada ba iha didin loloon halo lezada nia ulun kona pregu iha didin loloon rezulta kanek ki'ik. Akontesimentu ida ne'e mós lezada la hato'o keixa.

Iha 24 Marsu 2018, iha oras tuku 18:00 lokraik, arguidu nafatin deskonfia lezada ho mane seluk no arguidu dudu monu lezada ba rai no basa dala ida iha lezada nia hasan parte loos. Arguidu lori tali ida kesi lezada nia liman no ain no husik lezada iha kuartu laran no iha oras tuku 05:00 madrugada mak foin arguidu ba kore fali tali refere. Arguidu nia aktu hirak ne'e rezulta moras iha lezada nia hasan, liman no ain moras no halo mós lezada trauma.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 prizaun konjuga ho artigu 2, 3(a) no 35(a) LKVD.

Produsaun ba prova sira

Iha prosesu julgamentu, arguidu hili direitu atu nonook. Enkuantu lezada kontinua konfirma faktu sira iha akuzasaun no deklarata katak arguidu deskonfia lezada ho mane seluk.

Lezada mós deklarata katak arguidu nia hahalok ne'e hanesan toman at ida ka abitua ona ne'ebé kuandu arguidu mehi no hakfodak mai sempre fanu lezada no halo kedas agresaun hasoru lezada. Lezada hatutan katak nunka loke odamatan iha kalan no nia la namora ho mane seluk maibé arguidu naran deskonfia de'it.

Alegasaun finál

Prokuradór konsidera arguidu provadu komete krime maus-tratus ba kónjuje tuir akuzasaun prokuradór nian. Aleinde ne'e, krime violénsia doméstika kontinua rejista aas iha tribunál sira tanba ne'e atu halo prevensaun iha futuru, husu ba tribunál atu kondena arguidu ho pena prizaun tinan rua suspende ba tinan haat.

Enkuantu defeza husu ba tribunál atu aplika pena ne'ebé kmaan tanba di'ak malu ona ho lezada, arrepende ninia hahalok, promete la komete tan hahalok ne'e iha futuru no arguidu mak responsabiliza ba ninia família.

Desizaun

Depoisde tetu faktu sira hotu, tribunál prova katak bainhira arguidu hakfodak husi nia mehi no basa dala ida kedas iha lezada nia hasan parte karuk, tuku dala ida iha lezada nia liman kabun parte loos no tebe dala ida iha lezada nia kelen parte karuk.

Tribunál mós prova katak arguidu rakut lezada nia fuuk no dudu lezada ba iha didin loloon halo lezada nia ulun kona iha pregu ne'ebé prega hela iha didin loloon.

Liutan tribunál mós prova katak iha kalan arguidu dudu monu lezada ba rai no bainhira lezada hadeer, arguidu basa dala ida iha lezada nia hasan parte loos no lori tali ida kesi lezada nia liman no ain husik lezada iha kuartu laran. Arguidu foin kore tali refere iha madrugada.

Bazeia faktu provadu sira ne'e hotu no tetu mós sirkunstánsia hotu-hotu ne'ebé iha, nune'e tribunál konklui no kondena arguidu ho pena prizaun tinan rua suspende ba tinan rua.

8. Krime expozisaun ka abandonu

Nú. Prosesu : 0011/18 BBBLB
Kompozisaun Tribunál : Koletivu
Juis : Dr. Samuel da Costa Pacheco, Dr. Alvaro Maria Freitas
Dr. Eusébio Xavier Victor
Prokuradór : Dr. João Marques
Defeza : Dr. Albino Pereira
Desizaun : Pena prizaun tinan 3 suspende ba tinan 3

Iha 21 Jullu 2020, Tribunál Distritál Suai liuhusi tribunál movel iha Maliana prezide julgamentu leitura akordaun ba krime expozisaun ka abandonu ne'ebé envolve arguida EdS hasoru nia oan, iha Munisípiu Bobonaro.

Akuzasaun Prokuradór

Prokuradór akuza katak iha 15 Maiu 2018, iha Balibo, arguida mesak ba hahoris (partu) iha duut laran ne'ebé ho distansia ba uma maizumenus metru 50. Depoizde hahoris tiha bebé ida, lezada husik hela bebé ne'e iha duut laran no arguida fila mesak ba uma. Arguida mós la fó hatene ba nia inan-aman tanba ta'uk no arguida nia inan-aman sira mós la nota durante arguida grávida.

Arguida nia aman rasik iha altura ne'ebá, iha dalan atu ba hili ai-maran mak rona lian tanis no testemuña hanoin bibi. Momentu testemuña la'o besik ba no haree bebé ida mak latan mesak hela iha duut leten no nia inan laiha. Testemuña rei tiha bebé ne'e no ba bolu nia feen hodi ba foti bebé ne'e lori mai uma. Bainhira lori tiha bebé ne'e ba uma, arguida nonook no nafatin la ko'alia sai katak nia mak inan husi bebé ne'e. Arguida nia inan-aman sira decide ba fó hatene polísia no momentu polísia to'o uma, arguida foin fó hatene ba nia-aman katak bebé ne'e nia oan. Rona ne'e, testemuña fó hatene ba polísia hodi halo investigasaun no lori bebé ne'e ba halo tratamentu iha

ospitál. Arguida nia hahalok ne'e rezulta bebé sofre kanek iha parte ren-toos, inus no kotuk laran tuir rezultadu atestadu médiku.

Prokuradór akuza arguida kontra artigu 143 nú. 1(b) no nú. 3 KP kona-ba expozisaun ka abandonu ho moldura penal tinan 1 to'o tinan 6.

Produsaun ba prova sira

Iha julgamentu, arguida konfesa integralmente katak faktu sira iha akuzasaun no deklara katak arrepende ninia hahalok. Arguida deklara mós katak bebé ne'e ho seksu fetu no agora idade tinan rua ona no hela hamutuk ho arguida nia inan-aman. Arguida haktuir katak iha momentu ne'ebá nia moe no tauk atu dehan sai ba nia inan-aman nune'e arguida deside hodi ba partu deit iha ai-laran no husik hela bebé iha ai-laran. Arguida mós deklara katak to'o agora nia la hetan bebé nia aman. Maibé arguida promete sei la halo tan hahalok ne'e iha futuru no agora dadaun arguida hola ona mane seluk no iha tan ona oan na'in rua.

Tribunál presinde la rona ona testemuña (arguida nia aman) ninia depoimentu tanba arguida konfesa faktu hotu iha akuzasaun.

Alegasaun finál

Prokuradór depoisde tetu faktu sira iha akuzasaun no konfisaun husi arguida, prokuradór konklui katak faktu sira prenze duni elementu krime ne'e nian. Maski arguida konfesa no konsidera sirkunstánsia sira hotu maibé atu halo prevensaun iha futuru no haree ba número krime abandonu no infantisídiu aumenta nune'e husu ba tribunál atu kondena arguida ho pena efetivu tinan 2 fulan 6.

Entretantu defeza husu ba tribunál atu aplika pena prizaun maibé suspende nia ezekusaun tanba arguida konfesa integralmente ba ninia hahalok. Aleinde ne'e, arguida mós hasoru situasaun sira hanesan, laiha responsabilidade husi labarik nia aman, moe no tauk ho nia inan-aman nune'e, arguida laiha intensaun atu husik hela nia-oan. Bebé mós sei bele salva no sei moris to'o agora no arguida mós hola ona mane seluk no iha tan ona oan-kaduak rua.

Desizaun

Tribunál prova katak arguida hahoris bebé ida iha duut laran no husik hela bebé ne'e iha ne'ebá. Durante arguida isin rua to'o hahoris, arguida la fó hatene ba nia inan-aman tanba ta'uk. Bebé refere konsege salva no moris to'o agora tanba arguida nia aman mak hetan no lori fila bebé ne'e. Bazeia ba faktu provadu ne'e no tetu mós sirkunstánsia sira hotu, nune'e tribunál konklui prosesu ne'e no kodena arguida ho pena prizaun tinan tolu suspende ba tinan tolu.

9. Krime kontrabandu

Nú. Prosesu : 0018/18 BBATB
Kompzisaun Tribunál : Koletivu
Juis : Dr. Samuel da Costa Pacheco, Dr. Alvaro Maria Freitas no
Dr. Eusébio Xavier Victor
Prokuradór : Dr. João Marques
Defeza : Dr. Manuel Amaral
Desizaun : Pena multa US\$60.00

Iha 21 Jullu 2020, Tribunál Distritál Suai liuhusi tribunál movel iha Maliana prezide julgamentu leitura akordaun ba krime kontrabandu ne'ebé envolve arguida Hermenegilda Amaral, Anibal Nunes dos Santos Serrão, Ludu da Piedade, Jorge Cune, Julito Pereira, no Augusto Amaral hasoru Estadu RDTL, iha Munisípiu Bobonaro.

Akuzasaun Prokuradór

Prokuradór akuza katak iha 07 Agostu 2018, iha oras tuku 06:00 dadeer, arguida no arguidu sira lori tama objetu sira hanesan mina-rai no gasolina husi Atambua-Indonezia. Arguida Hermenegilda hatama gasolina litru 140, arguidu Anibal Nunes dos Santos serrão hatama mina-rai ho kuantidade litru 120 (bidón 1), arguida Ludu da Piedade hatama gasolina litru 245, arguidu Jorge Cune hatama mina-rai litru 515, arguidu Julito Pereira hatama gasolina litru 165 no arguidu Agostu Amaral hatama gasolina litru 220.

Arguida no arguidu sira rai objetu sira ne'e iha sira nia armajen ka Baraka no sei faan tutan ba sira nia kliente sira husi Dili. Arguida no arguidu sira sosa objetu sira ne'e kada bidón ho valór osan entre US\$135.00 to'o US\$170.00 no kada jerigen litru 20 ho folin US\$15.00.

Arguida no arguidu sira hetan kapturasaun husi ekipa Diresaun Nasionál Jestaun Risku husi Alfândega hamutuk ho Polísia Militar ne'ebé lidera husu Deolindo da Cruz Pereira iha Sulilaran-Atabae.

Prokuradór akuza arguida no arguidu sira kontra artigu 316 nú 1 no 2 KP kona-ba kontrabandu ho moldura penál tinan 2 to'o tinan 8 ka multa.

Produsaun ba prova sira

Iha julgamentu, arguida no arguida sira konfesa integralmente ba faktu sira iha akuzasaun prokuradór nian. Arguida no arguidu sira mós deklara katak foin primeiravés mai hatan iha tribunál, arrepende ona sira ninia hahalok no promete sei la halo tan hahalok ne'e iha futuru. Arguida no arguidu sira mós haktuir katak objetu sira

ne'e sira sosa husi ema estranjeiru-Indonezia no sira hatama objetu sira ne'e husi Fronteira Mota-ain.

Alegasaun finál

Prokuradór haktuir katak arguida no arguidu sira nu'udar autór materiál ba krime kontrabandu bazeia ba konfisaun arguida no arguidu sira nian. Arguida no arguidu sira hetan kapturasaun husi ekipa Diresaun Nasionál Jestaun Risku ho Polísia Militar.

Prokuradór haree katak krime kontrabandu kontinua akontese maski halo prosesu ba aktu sira ne'e maibé laiha mudansa no dala ruma iha situasaun COVID-19 mós atividade ilegál ne'e kontinua akontese. Tanba ne'e atu halo prevensaun iha futuru, husu ba tribunál atu kondena arguida arguidu sira ho pena prizaun tinan rua suspende ba tinan tolu no husu mós atu objetu sira ne'e afavór ba estadu.

Entretantu parte defeza la iha opozisaun no konkorda ho prokuradór nia alegasaun.

Desizaun

Depoizde tetu no avalia faktu sira hotu, tribunál prova katak arguida no arguida sira hatama objetu sira hanesan gasolina no mina-rai mai Timor-Leste liuhusi Fronteira Mota-ain, Atambua-Indonezia.

Bazeia ba faktu provadu sira ne'e, konfirmasaun husi arguida no arguidu sira no tetu mós ba sirkunstánsia sira, tribunál konklui prosesu ne'e no kondena arguida no arguidu sira ho pena multa US\$60.00, ne'ebé arguida no arguidu sira sei selu kada loron US\$1.00 durante loron 60. Tribunál mós fiksa pena alternativa durante loron 30 iha prizaun bainhira arguida no arguidu sira la kumpri pena multa ne'e.

10. Krime kontrabandu

Nú. Prosesu	: 0022/16 BBBGD
Kompzisaun tribunál	: Koletivu
Juis	: Dr. Álvaro Maria Freitas, Dr. Samuel da Costa Pacheco no Dr. Eusébio Xavier Victor
Prokuradór	: Dr. Napoleão Soares da Silva
Defeza	: Dr. Albino Pereira
Desizaun	: Pena prizaun tinan 2 suspende ba tinan 3

Iha 21 Jullu 2020, Tribunál Distritál Suai liuhusi tribunál movel iha Maliana prezide julgamentu leitura akordaun ba krime kontrabandu ne'ebé envolve arguidu Carlos Gonçalves no Abreo Gonçalves hasoru Estadu RDTL, iha Munisípiu Bobonaro.

Akuzasaun Prokuradór

Prokuradór akuza katak iha 13 Agostu 2016, iha oras tuku 10:00 dadeer iha Palaka, arguidu Carlos Gonsçalves simu kontaktu husi Herry (sidadaun Indonezia) no

depoisde koa'lia hotu, arguidu ba kedas Mota-ain no lori mós ho osan US\$550.00. Osan ne'e arguidu la entrega direita ba Herry maibé entrega fali ba ema seluk ida ne'ebé Herry haruka hodi simu osan husi arguidu. Depoisde entrega osan ne'e, arguidu mós filafali ba nia uma iha Palaka. Iha oras tuku 19:00 kalan, Herry kontaktu fali arguidu no haruka arguidu ba hein nia iha tasi-ibun Palaka. Arguidu mós bolu tan arguidu Abreo hodi hamutuk ba iha tasi-ibun Palaka nian.

Momentu to'o iha tasi ibun, sira haree bero ida tula ema na'in rua (Herry mak haruka) ne'ebé arguidu sira la koñese. Ema sira ne'e para bero iha tasi-ibun no hamutuk ho arguidu na'in rua hatun tua ho marka *habook* doos 25 no lori kedas tua sira ne'e ba rai iha uma. Iha oras tuku 21:00 kalan, bero ne'e lori tan tua *habook* hamutuk doos 25.

Tuir mai iha 14 Agostu 2016, iha oras tuku 20:00 kalan, bero refere kontinua lori tan tua ho marka *habook* hamutuk doos 50 (lori dala rua). Arguidu sira ba simu no lori kedas ba rai iha uma. Arguidu sira sosa tua ne'e kada doos ho folin US\$18.00 nune'e tua doos 100 ho folin hamutuk US\$1800.00. Husi tua doos 100 ne'e arguidu sira faan ona doos 24 ba loja iha Palaka no restu rai iha uma maibé ema deskoñesidu balun foti tiha tua restu sira ne'e sein koñesimentu arguidu sira tanba arguidu sira laiha uma.

Prokuradór akuza arguidu sira kontra artigu 316 KP kona-ba kontrabandu ho moldura penál tinan 2 to'o tinan 8 ka multa.

Produsaun ba prova sira

Iha julgamentu, arguidu sira konfesa sira ninia hahalok tuir faktu sira iha akuzasaun.

Tribunál presinde deklarasaun testemuña nian tanba arguidu na'in rua konfesa faktu hotu iha akuzasaun.

Alegasaun finál

Prokuradór konsidera arguidu sira nia hahalok ne'e prenze duni elementu krime ne'e nian, nune'e husu ba tribunál atu kondena arguidu ho pena prizaun tinan rua suspende ba tinan rua no kada arguidu selu kustu judisiál US\$20.00.

Entretantu defeza husu ba tribunál atu kondena arguidu sira ho suspensaun ba pena prizaun tanba arguidu sira konfesa sira ninia hahalok no konsidera arguidu sira komete aktu ne'e tanba situasaun moris loron-loron mak orbriga.

Desizaun

Tribunál prova katak arguidu sira halo kontaktu ho sidadaun Indonezia ho naran Herry no hatama tua ho marka *habook* hamutuk doos 100 ho folin US\$1,800 (kada doos US\$18.00), liuhusi tasi-ibun Palaka. Tribunál mós prova katak arguidu sira konsege faan ona tua hamutuk doos 24 no restu rai iha uma maibé iha ema deskoñesidu balun foti tiha tua restu sira ne'e.

Bazeia ba faktu provadu sira ne'e no tetu mós ba sirkunstánsia sira hotu, tribunál konklui no kondena arguidu sira ho pena prizaun tinan rua suspende ba tinan tolu.

11. Krime ofensa ba integridade fízika grave¹

Nú. Prosesu : 0016/17. BBBLB
Kompozisaun Tribunál : Koletivu
Juis : Dr. Samuel d. C. Pacheco, Dr. Álvaro M. Freitas no Dr. Eusébio X. Victor
Prokurdór : Dr. Rafael Jeronimo Gusmão
Defeza : Dr. Anselmo Pinto
Desizaun : Pena prizaun tinan 2 suspende ba tinan rua no absolve

Iha 21 Jullu 2020, Tribunál Distritál Suai prezide julgamentu leitura akordaun ba krime ofensa ba integridade fízika grave ne'ebé envolve arguidu Nelson Purificação, Arcanjo Simão no Narcisio Sanches hasoru lezadu Moises de Carvalho, iha Munisípiu Bobonaro.

Akuzasaun Prokuradór

Prokuradór akuza katak iha 03 Dezembru 2017, iha lora ne'ebé la apuradu, arguidu sira no lezadu partisipa serimonia agradesimentu ba graduasaun nian. Iha madrugada, lezadu sai husi tenda laran atu ba sosa sigaru iha kioske ne'ebé nia distansia dok husi fatin serimonia. Momentu sai husi tenda laran ne'e, lezadu haree arguidu Narcisio hamrik mesak hela iha tenda liur. Arguidu Narcisio hase lezadu no husu lezadu atu ba ne'ebé no lezadu mós hatan atu ba sosa sigaru. Lezadu kontinua la'o ba kioske maibé tanba kioske taka hela nune'e lezadu filafali deit. Maibé momentu lezadu atu tama fali ba tenda laran, arguidu Nelson lori ai no baku dala ida iha lezadu nia ulun, arguidu Narcisio no Arcanjo tuku no tebe lezadu halo lezadu monu ba rai. Aktu sira ne'e, rezulta lezadu sofre kanek no ran sai maka'as iha ulun no suku pontu sanulu resin ualu. Kazu ne'e akontese, tanba antes ne'e lezadu baku arguidu Narcisio.

Prokuradór akuza arguidu sira kontra artigu 146 KP kona-ba ofensa ba integridade fízika grave ho moldura penál tinan 2 to'o 8 prizaun.

Produsaun ba prova sira

Iha prosesu julgamentu, arguidu Nelson Purificação deklara katak antes akontesimentu ne'e lezadu mak baku uluk arguidu Narcisio, tanba ne'e arguidu husu ba lezadu kona-ba lezadu baku arguidu Narcisio ne'e, maibé lezadu lakohi ko'alia. Ho nune'e, arguidu

¹ JSMP la monitoriza alegasaun finál husi kazu ida ne'e, tanba julgamentu kontinuaun hala'o iha julgamentu movei iha Munisípiu Maliana.

lori ai no baku dala ida iha lezadu nia ulun. Arguidu mós hatutan katak tebe dala ida iha lezadu nia kotuk laran.

Arguidu Arcanjo Simão deklara katak iha akontesimentu ne'e arguidu husu tuir deit kona-ba problema ne'ebé akontese entre lezadu ho arguidu Narcisio, maibé lezadu lakohi ko'alia no tuku hasoru arguidu, maibé la kona arguidu tanba arguidu hases-aan tiha. Aleinde ne'e, arguidu mós deklara katak nia la tebe no la tuku lezadu, arguidu so haree deit arguidu Nelson tebe dala ida iha lezadu nia kotuk laran. Entretantu kona-ba ema baku lezadu nia ulun, arguidu deklara katak la haree se mak baku.

Arguidu Narcisio Sanches deklara katak antes akontesimentu ne'e lezadu mak baku uluk arguidu, tanba ne'e arguidu nia maun na'in rua, Nelson no Arcanjo atu husu tuir de'it ba lezadu hodi rezolve tuir família, maibé lezadu lakohi no bolu nia maun alin hodi duni fali arguidu sira. Arguidu deklara mós katak iha akontesimentu ne'e nia la tuku no tebe lezadu.

Iha parte seluk lezadu konfirma faktu hotu iha akuzasaun no deklara mós katak iha akontesimentu ne'e lezadu la hatene se mak baku lezadu nia ulun, tuku no tebe lezadu, tanba lezadu sofre kanek grave iha ulun to'o desmaia.

Desizaun

Depoizde avalia faktu hotu, tribunál prova katak arguidu Nelson tebe dala ida iha lezadu nia kotuk laran no lori ai baku dala ida iha lezadu nia ulun. Enkuantu arguidu Narcisio no arguidu Arcanjo, tribunál la prova tuku no tebe lezadu. Bazeia ba faktu provadu no la provadu sira ne'e, tribunál konklui prosesu ne'e no kondena arguidu Nelson Purificação ho pena prizaun tinan rua suspende ba tinan rua no absolve arguidu Narcisio no arguidu Arcanjo husi akuzasaun ne'e.

12. Krime ofensa ba integridade fízika simples ho natureza violénsia doméstika

Nú. Prosesu : 0026/20. CVSUI
Kompozisaun Tribunál : Singulár
Juis : Dra. Patricia de Araújo F.B.M. Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena multa US\$90.00

Iha 22 Jullu 2020, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PdS (ajente PNTL) hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha loron la apuradu maibé iha tinan 2020, oras tuku 12:00 meiodia, lezada simu mensajen husi nia kolega feto ida liuhusi *Whatsapp* ne'ebé dehan katak nia mak soran lezada ho arguidu (feen ho la'en).

Depoisde ne'e, lezada fila husi serbisu fatin no hatudu mensajen ne'e ba arguidu maibé arguidu hateten ba lezada katak '*lalika fiar bulak sira ne'e*'. Arguidu mós sae nia motor ba buka tuir lezada nia kolega feto ne'e iha nia uma. Lezada mós ho motor tuir kedas arguidu maibé antes arguidu to'o iha lezada nia kolega feto ne'e nia uma, lezada to'o uluk ona. Arguidu tenta soke lezada maibé la konsege no arguidu tun husi motor no tebe dala ida iha lezada nia kabun rezulta moras no bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklarata katak husu ona deskulpa ba lezada. Arguidu mós deklarata katak arrepende ninia hahalok ne'e, foin primeiravés mai hatan iha tribunál no promete sei la repete tan nia hahalok ne'e iha futuru.

Aleinde ne'e, lezada mós konfirma faktu sira iha akuzasaun no reforsa tan arguidu nia deklarasaun katak arguidu husu ona deskulpa ba lezada no la baku ona lezada.

Alegasaun finál

Prokuradór haktuir katak arguidu konfesa integralmente ba faktu sira, lezada mós konfirma faktu sira, sira di'ak malu ona, arguidu arrepende ona ninia hahalok maibé atu halo prevensaun iha futuru, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu konsidera arguidu konfesa integralmente ba faktu sira iha akuzasaun, arrepende ona ninia hahalok no promete sei la komete tan krime hasoru membru família sira. Tanba ne'e, husu tribunál aplika pena multa ba arguidu.

Desizaun

Depoisde avalia faktu sira hotu, tribunál prova katak arguidu tebe dala ida iha lezada nia kabun. Bazeia ba faktu provadu ne'e no tetu sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál

no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$90.00. Pena multa ne'e sei selu gradualmente US\$0.50 kada loron durante loron 180. Bainhira arguidu la selu pena multa ne'e, arguidu sei kumpri iha prizaun durante loron 30 nu'udar pena alternativa.

13. Krime denúnsia kalunioza

Nú. Prosesu : 0009/16. CVSUI
Kompozisaun Tribunál : Singulár
Juis : Dr. Álvaro Maria Freitas
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Absolve

Iha 22 Jullu 2020, Tribunál Distritál Suai prezide julgamentu leitura sentensa ba krime denúnsia kalunioza ne'ebé envolve arguida MA hasoru lezada MXA, iha Munisípiu Covalima.

Akuzasaun Prokuradór

Prokuradór akuza katak iha 12 Feveireiru 2016, iha oras tuku 09:00 dadeer, lezada nia tian sira (EdC no SH) ba iha arguida nia uma hodi informa kona-ba lezada nia kondisaun (isin-rua) husi EJ nu'udar arguida nia la'en. Rona tiha informasaun ne'e, arguida ba iha lezada nia uma no tolok lezada iha ema barak nia oin inklui dehan lezada hadau ema nia la'en no faan an tun sae. Lezada sente moe no ba hato'o keixa tanba hanesan fetu ida nia dignidade monu.

Prokuradór akuza arguida kontra artigu 285 KP kona-ba denúnsia kalunioza ho moldura penál to'o tinan 3 ka multa.

Produsaun ba prova sira

Iha julgamentu, arguida deklara integralmente katak akuzasaun loos hotu. Arguida mós deklara katak lezada amante ho arguida nia la'en nune'e arguida ba tolok lezada. Liutiha maizumenus minutu 10, lezada ho nia tian EdC, SH no lezada nia inan, tuir arguida ba iha arguida nia uma no tolok arguida no koa'lia arguida katak faan an tun sae. SH atu buti arguida nia kakorok maibé arguida baku sees tiha SH nia liman. Arguida hatutan katak foin primeiravés hatan iha tribunál.

Aleinde ne'e, lezada kontinua konfirma faktu sira iha akuzasaun no deklara katak momentu arguida ba iha nia uma ne'e, lezada iha hela uma laran. Bainhira rona arguida tolok, lezada sai husi uma laran no tolok fali arguida ho liafuan hanesan.

Testemuña EdC nu'udar lezada nia tian depoimenta katak arguida ba tolok lezada iha lezada nia uma tanba ne'e mak halo testemuña la simu no sira ba tuir fali arguida iha nia uma no tolok fali arguida ho lia fuan ne'ebé hanesan.

Testemuña SH nu'udar lezada nia tian depoimenta katak arguida tolok lezada tuir nia hakarak de'it tanba ne'e testemuña mós tolok fali arguida no atu buti arguida nia kakorok maibé arguida baku sees tiha testemuña nia liman.

Aleinde ne'e testemuña OM nu'udar lezada nia inan mós depoimenta katak arguida tolok lezada nune'e testemuña mós tolok fali arguida ho liafuan hanesan.

Alegasaun finál

Prokuradór haktuir katak depoimde rona tiha arguida, lezada no testemuña sira, tetu katak faktu sira iha akuzasaun ne'e la prenze elementu krime denúnsia kalunioza. Tanba ne'e, husu ba tribunál atu decide tuir konviksaun tribunál nian.

Nune'e mós defeza haktuir katak arguida ninia hahalok ne'e la prenze rekezitu sira husi krime denúnsia kalunioza. Tanba ne'e, husu ba tribunál absolve arguida husi akuzasaun prokuradór.

Desizaun

Depoimde avalia faktu sira hotu, tribunál prova katak arguida tolok lezada maibé tribunál intende katak faktu ne'e la prenze elementu krime denúnsia kalunioza. Bazeia ba prova no konsiderasaun ne'e, tribunál absolve arguidu husi akuzasaun prokuradór.

14. Krime abuzu seksuál ba menór ho natureza violénsia doméstika²

Nú. Prosesu : 0010/19. MFSIC
Kompozisaun Tribunál : Koletivu
Juis : Dr. Nasson M. Armindo. Doutel, Dr. Jose M. Araújo no Dr. Benjamin Barros
Prokuradór : Dr. José Elo
Defeza : Dr. Albino de Jesus Pereira
Desizaun : Pena prizaun tinan 15

Iha 22 Jullu 2020, Tribunál Distritál Suai prezide julgamentu leitura akordaun ba krime abuzu seksuál ba menór ho natureza violénsia doméstika ne'ebé envolve arguidu IF hasoru lezada AdSX nu'udar nia kuñada ho idade tinan 11, iha Distritu Manufahi.

² JSMP la monitoriza alegasaun finál husi kazu ida ne'e, tanba julgamentu kontinuasaun hala'o iha julgamentu movel iha Munisípiu Maliana.

Akuzasaun Prokuradór

Prokuradór akuza katak iha 27 Jullu 2019, lezada tein hela iha dapur laran no derrepente arguidu ba re'i lezada nia hasan parte loos no depoisde arguidu haruka lezada habosok arguidu nia oan toba. Hafoin arguidu nia oan toba, arguidu dada lezada nia liman ba iha kuartu laran no kolu lezada nia kalsa. Arguidu mós hasai nia ropa no tuur iha lezada nia hitin no buti lezada nia hirus-matan no halo relasaun seksuál ho lezada. Lezada la ko'alia sai aktu ne'e ba ema ida.

Tuir mai iha 28 Jullu 2019, oras meiudia, arguidu bolu tan lezada ba iha kuartu laran no halo tan relasaun seksuál ho lezada. Arguidu halo relasaun seksuál lor-loron bainhira arguidu nia feen ba serbisu. Hafoin halo relasaun seksuál, arguidu hateten ba lezada katak "*ó keta ko'alia sai ba ó nia bin, se lae hau sei lori tudik sona mate ó*". Iha akontesimentu ba dala segundu ne'e, lezada sente moe no halai ba tiha iha nia tian nia uma. Konsekuensia direta husi hahalok arguidu nian ne'e halo lezada sofre moras no ran iha nia orgaun seksuál no mós sofre moras iha kabun kidun.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 20, konjuga ho artigu 2, 3(c), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun. Arguidu deklara katak momentu lezada tein hela iha dapur laran, arguidu re'i dala ida iha lezada nia hasan parte loos maibé re'i lezada ho sentimentu triste no hanoin, tanba antes ne'e arguidu nia feen baku lezada. Arguidu mós deklara katak arguidu haruka lezada habosok arguidu nia oan atu toba duni maibé arguidu la kolu lezada nia ropa no nunca halo relasaun seksuál ho lezada. Aleinde ne'e, arguidu hatutan katak lezada la hela hamutuk ho arguidu no dala ruma de'it mak lezada ho arguidu nia inan mai toba iha arguidu nia uma.

Enkuantu lezada kontinua konfirma faktu hotu iha akuzasaun no deklara mós katak antes ne'e lezada hela ho lezada nia tian, maibé liu loran rua lezada ba hela fali ho arguidu tanba lezada nia bin mak arguidu nia feen. Lezada hatutan tan katak depoisde akontesimentu primeiru, arguidu kontinua halo tan relasaun seksuál ho lezada. Tanba tauk no moe lezada halai sai husi uma no ba fó hatene lezada nia tian kona-ba akontesimentu ne'e no lezada nia tian nia oan sira mak ba fó hatene ba lezada nia inan-aman, hafoin liu tiha loran rua lezada nia inan-aman lori lezada ba iha ospital hodi halo ezaminasaun médiku.

Testemuña FX nu'udar arguidu nia feen depoimenta katak durante ne'e lezada hela ho arguidu nia inan-aman no dala ruma de'it mak lezada ho arguidu nia inan ba toba iha testemuña nia uma hodi hein testemuña ho arguidu nia oan, momentu testemuña ba serbisu iha restorante. Testemuña mós depoimenta katak testemuña hatama

lezada ba serbisu iha restaurante ne'e, maibé lezada foti (na'ok) restaurante nia osan US\$10.00 nune'e testemuña sente moe no baku lezada. Testemuña mak selu filafali restaurante nia osan refere. Aleinde ne'e, testemuña hatutan katak iha 27 Jullu 2019, testemuña baku tan lezada tanba lezada foti testemuña nia osan US\$7.00. Ho nune'e, lezada halai sai husi uma, la'os tanba arguidu mak halo relasaun seksuál ho lezada.

Testemuña MdC nu'udar lezada nia tian depoimenta katak bainhira lezada mai husi foho, lezada hela ho testemuña durante loron rua. Depoisde ne'e, lezada ba hela ho arguidu hodi hein arguidu nia oan, tanba arguidu nia feen serbisu tiha iha restaurante. Testemuña depoimenta liutan katak depoisde akontesimentu ne'e, lezada halai husi arguidu nia uma no ba hela fali ho testemuña no testemuña haree lezada nia isin fitar hotu. Nune'e testemuña husu ba lezada kona-ba nia isin fitar ne'e no lezada hatan katak "*arguidu perkosa (viola) ona hau*" maibé testemuña la hatene kona-ba liafuan perkosa ne'e no tanba lezada mós dehan sai akontesimentu ne'e ba testemuña nia oan, nune'e iha loron ne'e kedas testemuña nia oan ba fó hatene ba iha lezada nia inan-aman kona-ba akontesimentu ne'e.

Testemuña IL nu'udar arguidu nian inan depoimenta katak fofoun lezada mai husi foho no hela ho testemuña MdC durante loron rua. Depoisde ne'e, lezada halai no mai hela fali ho testemuña. Testemuña mós depoimenta katak arguidu nia feen hatama lezada ba serbisu iha restaurante no dalaruma de'it iha Sabdu no Domingo mak lezada ba hein arguidu nia oan no dala ruma mós toba iha arguidu nia uma, maibé la'os hela hamutuk ho arguidu sira. Testemuña mós deklara katak la hatene kona-ba akontesimentu ne'e.

Testemuña IC nu'udar pesoál médiku depoimenta katak bainhira testemuña halo ezaminasaun no deskobre katak iha duni kanek iha lezada nia orgaun seksuál no lezada nia hymen laiha ona.

Desizaun³

Depoisde avalia faktu hotu, tribunál prova katak arguidu komete abuzu seksuál hasoru lezada ne'ebé hela ho arguidu no sei idade menoridade, tinan 11. Bazeia ba faktu provadu sira no sirkunstánsia sira hotu, tribunál konklui prosesu ne'e no kondena arguidu ho pena prizaun tinan 15 prizaun.

15. Krime ofensa ba integridade física simples ho natureza violénsia doméstika

Nú. Prosesu : 0014/20. CVMCT
Kompozisaun Tribunál : Singulár
Juis : Dr. Álvaro Maria Freitas
Prokuradór : Dr. Napoleão Soares da Silva

³ Desizaun kazu ne'e tribunál notifika de'it ba parte sira.

Defeza : Dr. Domingos dos Santos
Desizaun : Pena prizaun fulan 6 suspende tinan 1

Iha 24 Jullu 2020, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AMA hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 13 Maiu 2020, iha oras tuku 17:00 lokraik, arguidu ho nia oan mane ho idade tinan sia atu ba foti duut iha to'os hodi fó han karau. Maibé lezada bandu arguidu lori sira nia oan no dehan katak "*ó ba mesak ladi'ak ka atu kalan ona mós ó tenke ba ho labarik'*. Rona ne'e, arguidu tuku dala rua iha lezada nia kanuruk no foti ai-kafé no baku dala rua iha lezada nia ain parte loos rezulta lezada moras.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3 (a), 35 (b) no 36 LKVD.

Produsaun prova sira

Iha julgamentu, arguidu konfesa faktu sira iha akuzasaun no deklarata katak arguidu husu kedas deskulpa ba lezada. Arguidu mós deklarata katak foin primeiravés mai hatan iha tribunál, arrepende ninia hahalok, promete sei la repete tan hahalok ne'e iha futuru no agora arguidu la baku ona lezada.

Nune'e mós lezada kontinua konfirma faktu sira iha akuzasaun inklui konfirma ho arguidu nia deklarasaun katak depoisde akontesimentu arguidu husu kedas deskulpa ba lezada no agora arguidu la baku ona lezada.

Alegasaun finál

Prokuradór konsidera arguidu provadu komete krime ofensa integridade fízika simples. Tanba ne'e, atu halo prevensaun iha futuru, husu ba tribunál atu kondena arguidu ho pena prizaun tinan ida suspende ba tinan ida fulan neen.

Entretantu defeza haktuir katak arguidu foin primeiravés mai hatan tribunál, arguidu konfesa hotu faktu sira iha akuzasaun, arrepende ona ninia hahalok no promete la repete tan ninia hahalok ne'e iha futuru. Arguidu mós husu ona deskulpa ba lezada no di'ak malu ona. Tanba ne'e, husu ba tribunál atu aplika pena multa ba arguidu tuir nia kapasidade.

Desizaun

Tribunál prova katak arguidu tuku dala rua iha lezada nia kanuruk, uza ai-kafé no baku dala rua iha lezada nia ain sorin loos. Bazeia ba prova sira ne'e no konsidera sirkunstánsia atenuante sira hanesan arguidu foin primeiravés mai hatan iha tribunál, arguidu konfesa ninia hahalok, arrepende no promete la repete ninia hahalok ne'e, nune'e tribunál konklui no kondena arguidu pena prizaun fulan neen suspende ba tinan ida.

16. Krime ofensa ba integridade fízika simples

Nú. Prosesu : 0097/19. PDSUA
Kompozisaun Tribunál : Singulár
Juis : Dr. Nasson Mário Armindo M. Doutel
Prokuradór : Dr. Napoleão Soares da Silva
Defesa : Dr. Albino de Jesus Pereira
Desizaun : Pena multa US\$25.00

Iha 26 Jullu 2020, Tribunál Distritál Suai prezide julgamentu leitura sentensa ba krime ofensa ba integridade fízika simples ne'ebé envolve arguidu Julio Maia da Silva, Oscar da Costa Sarmiento no Albino Cardozo (arguidu sira nu'udar membru PNTL) hasoru lezadu Reinaldo Pereira, iha Munisípiu Covalima.

Akuzasaun Prokuradór

Prokuradór akuza katak iha 28 Agostu 2019, iha oras tuku 09:00 dadeer, iha Aldeia Fatuk-oan, polisia halo auto-stop iha área refere no hapara lezadu no husu kona-ba dokumentu motor nian no dokumentu tula karau nian tanba lezadu informa katak atu ba tula karau. Maibé lezadu hatan pergunta refere ho liafuan ne'ebé ladun di'ak. Ho nune'e, arguidu Julio Maia da Silva basa dala rua iha lezadu nia hasan parte karuk no tebe dala ida iha lezadu nia kabun. Entretantu arguidu Oscar da Costa Sarmiento tebe dala rua iha lezadu nia kabun no lori kilat fai dala ida iha lezadu nia kabun. Nune'e mós arguidu Albino Cardozo, tebe dala rua iha lezadu nia kabun. Arguidu sira nia agresaun ne'e rezulta lezadu sofre moras iha kabun no hasan.

Prokuradór akuza arguidu sira kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Iha prosesu julgamentu, arguidu Julio Maia da Silva deklara katak iha akontesimentu ne'e arguidu husu karta lisensa tula karau nian no surat motor nian, maibé lezadu hatan ho liafuan ne'ebé ladun di'ak. Nune'e, sira diskute malu no arguidu basa dala ida iha lezadu nia hasan parte karuk no tebe dala ida iha lezadu nia kelen. Arguidu hatutan katak nia komete krime ne'e tanba konsidera lezadu lakohi kooperera ho PNTL momentu hala'o serbisu.

Arguidu Oscar da Costa Sarmiento deklara katak antes akontesimentu ne'e arguidu halo hela patrolamentu iha área Tafara. Bainhira fila no to'o iha fatin akontesimentu, arguidu haree lezadu nia jeitu hanesan la respeitu ona arguidu Julio Maia da Silva ne'ebé nu'udar nia komandante Segundu Sarjentu, tanba ne'e arguidu tebe dala ida iha lezadu nia kabun no lori kilat fai dala ida iha lezadu nia kabun.

Aleinde ne'e, arguidu Albino Cardozo mós deklara katak iha akontesimentu ne'e arguidu haree lezadu diskute malu hela ho arguidu Julio Maia da Silva ne'ebé hanesan mós arguidu nia komandante tanba ne'e arguidu tebe dala ida iha lezadu nia ain-kabun. Arguidu hatutan katak iha akontesimentu ne'e arguidu halo hela patrolamentu no lori deit mak pistola no *gas airmata*.

Entretantu, lezadu kontinua konfirma faktu hotu iha akuzasaun no deklara mós katak iha momentu ne'ebá lezadu husu ba polísia dehan katak "*ami atu tula karau bele liu ka lae?*", nune'e arguidu Julio Maia da Silva husu karta lisensa tula karau nian. Maibé tanba lezadu haluha hela iha uma nune'e arguidu haruka lezadu ba foti karta lisensa ne'e. Bainhira lezadu ba foti tiha no lori mai entrega, arguidu Julio Maia da Silva la ko'alia buat ida no basa dala rua iha lezadu nia hasan parte karuk no tebe dala ida iha lezadu nia kabun no arguidu na'in rua seluk tebe dala rua iha lezadu nia kabun no arguidu Oscar da Costa lori kilat fai dala ida iha lezadu nia kabun.

Testemuña Anito Araújo nu'udar lezadu nia primu depoimenta katak testemuña haree deit arguidu sira baku lezadu no fai kilat iha lezadu nia kabun, maibé la hatene motivu husi akontesimentu ne'e.

Testemuña Venancio Cabral nu'udar komunidade ne'ebé hela besik iha fatin akontesimentu ne'e depoimenta katak haree arguidu sira baku lezadu, maibé la hatene kona-ba motivu husi akontesimentu ne'e.

Alegasaun finál

Prokuradór konsidera arguidu sira provadu komete krime ofensa ba integridade fízika simples hasoru lezadu. Tanba ne'e, mezmú arguidu sira konfesa parsial deit maibé prokuradór fiar liu ba iha lezadu nia deklarasaun no testemuña sira nia depoimentu. Bazeia ba konsiderasaun sira ne'e, husu ba tribunál atu kondena arguidu sira ho pena prizaun fulan tolu suspende nia ezekusaun ba tinan ida.

Entretantu defeza haktuir katak arguidu sira hala'o hela sira nia serbisu no lezadu lakohi kooperana no hatudu fali jeitu ne'ebé ladi'ak, tanba ne'e arguidu sira komete aktu sira ne'e hasoru lezadu. Nune'e, husu ba tribunál atu kondena arguidu na'in tolu ho pena admoestasaun.

Desizaun

Depoisde avalia faktu hotu ne'ebé prodús durante julgamentu, tribunál prova katak arguidu Julio Maia da Silva basa dala rua iha lezadu nia hasan parte karuk no tebe dala ida iha lezadu nia kabun. Tribunál prova arguidu Oscar da Costa Sarmiento tebe dala rua iha lezadu nia kabun no lori kilat fai dala ida iha lezadu nia kabun. Entretantu arguidu Albino Cardozo, tribunál prova tebe dala rua iha lezadu nia kabun.

Bazeia ba faktu provadu sira no tetu mós sirkunstánsia hotu-hotu, tribunál konklui prosesu ne'e no kondena kada arguidu ho pena multa US\$25.00. Arguidu idaidak gradualmente sei selu US\$1.00 kada loron durante loron 25. Bainhira arguidu sira la selu pena multa refere, arguidu sira sei kumpri iha prizaun durante loron 20 nu'udar pena alternativa.

17. Krime ofensa ba integridade fízika simples ho natureza violénsia doméstika

Nú. Prosesu : 0040/20 CVSUI
Kompozisaun Tribunál : Singulár
Juis : Dra. Patricia de Araujo F.B.M. Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena multa US\$ 60.00

Iha 28 Jullu 2020 Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika envolve arguidu VMA (ajente PNTL) hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 22 Abril 2020, iha oras tuku 12:00 meiodia, lezada fila husi natar no tanba kolen lezada la prepara modo. Ho nune'e, arguidu basa dala ida iha lezada nia hasan parte loos. Iha loron tuir mai, iha dadeer, arguidu atu ba serbisu maibé lezada la prepara matabisu nune'e arguidu basa dala barak iha lezada nia hasan parte loos no parte karuk no tuku dala ida iha lezada nia isin loloon halo lezada monu. Lezada nia subriña mak ajuda lori lezada ba iha nia uma laran maibé arguidu tuir lezada no rasta no basa dala rua iha lezada nia hasan parte loos. Aktu sira ne'e, rezulta lezada hetan moras iha hasan parte karuk, ulun, kabaas no lezada hetan tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara parsialmente katak faktu sira balun loos balun la loos. Arguidu rekoñese faktu ne'ebé akontese iha loron 22 Abril. Maibé iha loron tuir mai, arguidu deklara katak nia basa dala rua de'it la'os dala barak, tuku dala ida duni halo lezada monu ba rai no basa tan dala rua iha lezada nia hasan loos. Arguidu hatutan katak depoisde akontesimentu ne'e, arguidu husu deskulpa ba lezada, arrepende ninia hahalok, foin primeiravés mai hatan iha tribunál no promete sei la repete tan nia hahalok ne'e iha futuro.

Entretantu, lezada kontinua konfirma faktu sira iha akuzasaun inklui konfirma arguidu nia deklarasaun katak sira di'ak malu ona no to'o agora arguidu la baku ona lezada.

Alegasaun finál

Prokuradór konsidera arguidu provadu komete krime tuir faktu sira iha akuzasaun. Tanba ne'e, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak arguidu foin primeiravés mai hatan iha tribunál, arguidu konfesa no arrepende ona ninia hahalok. Arguidu mós promete sei la repete tan ninia hahalok ne'e iha futuro. Tanba ne'e, husu ba tribunál atu aplika pena multa ba arguidu.

Desizaun

Depoisde avalia faktu sira ne'ebé prodús durante julgamentu, tribunál prova katak arguidu basa dala ida iha lezada nia hasan parte loos no iha loron ida tuir mai arguidu basa dala barak iha lezada nia hasan parte loos no karuk no tuku dala ida iha lezada nia kotuk laran halo lezada monu ba rai. Tribunál mós prova katak arguidu rasta no basa dala rua tan iha lezada nia hasan parte loos.

Bazeia ba faktu provadu sira ne'e no tetu mós sirkunstánsia hotu-hotu ne'ebé haleu iha krime ne'e, tribunál konklui no kondena arguidu ho pena multa US\$60.00 ne'ebé arguidu sei selu kada loron US\$1.00 durante loron 60. Tribunál mós aplika pena alternativa durante loron 30 iha prizaun bainhira arguidu la selu pena multa refere.

18. Krime ofensa ba integridade fízika simples ho natureza violénsia doméstika

Nú. Prosesu : 0073/19. PDSUA
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. Napoleão Soares da Silva
Defeza : Dr. Manuel Amaral

Desizaun : Pena prizaun tinan 1 suspende ba tinan 1

Iha 28 Jullu 2020, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FC hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 19 Dezembru 2018, iha oras tuku 07:00 dadeer, lezada husu osan ba arguidu atu ba merkadu sosa labarik nia roupa maibé arguidu hatan ba lezada katak '*ó nia osan mak rai iha hau ka nu'usá ó husu osan mai hau?*'. Lezada mós hatan fali arguidu katak "*ó hanesan aman ida maibé la iha responsabilidade*". Ho nune'e, arguidu basa dala ida iha lezada nia hasan parte karuk, tuku dala ida iha nia kanuruk no tebe dala ida iha nia kotuk laran. Arguidu kaer lezada nia fuuk no riba lezada ba rai. Aktu sira ne'e rezulta moras iha lezada nia hasan parte karuk, kanuruk, kotuk laran no nia isin loloon.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu nega faktu sira hotu iha akuzasaun no argumenta katak arguidu la iha problema ho lezada no durante sira moris hamutuk nunka baku lezada. Arguidu hatutan katak nia rasik la hatene lezada keixa arguidu kona-ba problema saida.

Entretantu lezada kontinua konfirma faktu sira iha akuzasaun no deklara katak arguidu halai sai husi uma to'o sira fahe malu no maski sira fahe malu ona maibé sira iha relasaun dí'ak.

Alegasaun finál

Prokuradór haktuir katak arguidu nega faktu sira hotu ne'ebé imputa ba nia maibé lezada nafatin konfirma faktu sira iha akuzasaun prokuradór nian no prokuradór fiar liu ba lezada nia deklarasaun. Tanba ne'e, husu ba tribunál kondena arguidu ho pena prizaun tinan ida suspende ba tinan rua.

Entretantu defeza husu ba tribunál atu deside tuir tribunál nia konviksaun.

Desizaun

Depoisde tetu no avalia faktu sira hotu, tribunál prova katak iha produsaun ba prova arguidu nega hotu faktu sira iha akuzasaun maski nune'e tribunál fiar liu ba lezada nia deklarasaun katak arguidu basa dala ida iha lezada nia hasan parte karuk, tuku dala ida iha kanuruk, tebe dala ida iha kotuk laran no kaer lezada nia fuuk riba ba rai.

Bazeia ba faktu provadu sira ne'e no tetu mós sirkunstánsia sira hotu ne'ebé asociadu iha krime ne'e, tribunál konklui no kondena arguidu ho pena prizaun tinan ida suspende ba tinan ida.

19. Krime ofensa ba integridade fízika simples ho natureza violénsia doméstika

Nú. Prosesu : 0132/19 PDSUA
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Prizaun fulan 6 suspende ba tinan 1

Iha 28 Jullu 2020, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AB hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 03 Novembru 2019, iha oras tuku 17:00 lokraik, lezada ba foti modo iha viziñu nia uma no fó ba arguidu atu han maibé arguidu lakohi han no tolok fali lezada nia inan-aman nune'e lezada fakar tiha modo ne'e. Arguidu hirus no tuku dala ida iha lezada nia kanuruk no tebe dala ida iha lezada nia kidan no basa dala haat iha lezada nia hasan parte loos. Aktu sira ne'e, rezulta moras iha lezada nia hasan parte loos, kanuruk no kidan.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3 (a), 35 (b) no 36 LKVD.

Produsaun ba prova sira

Iha julgamentu, arguidu deklara parsialmente katak faktu sira balun loos no balun la loos. Arguidu rekoñese katak tuku dala ida iha lezada nia kanuruk no basa dala ida de'it iha lezada nia hasan parte karuk. Entretantu kona-ba tebe dala ida iha lezada nia kidan, arguidu dehan la loos. Arguidu mós hatutan katak liutiha semana ida, sira di'ak

malu kedas no to'o agora la baku ona lezada. Arguidu arrepende ninia hahalok no promete sei la repete iha futuru.

Entretantu, lezada kontinua konfirma faktu sira iha akuzasaun no deklara katak durante moris hamutuk arguidu la halo agresaun hasoru lezada no depoisde akontesimentu ne'e to'o agora arguidu la baku ona lezada.

Alegasaun final

Prokurador konsidera arguidu provadu komete krime ofensa ba integridade fizika simples tuir faktu sira iha akuzasaun. Tanba ne'e, maski sira di'ak malu ona maibe atu evita no prevene arguidu la komete tan krime iha futuru, husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza haktuir katak arguidu arrepende ona ninia hahalok no to'o agora la repete ninia hahalok. Arguidu mos foin primeiraves mai hatan iha tribunal no promete sei la repete ninia hahalok ne'e. Tanba ne'e, husu ba tribunál atu kondena arguidu ho pena multa tuir arguidu nia kapasidade.

Desizaun

Tribunál prova katak arguidu tuku dala ida iha lezada nia kanuruk, tebe dala ida iha lezada nia kidan no basa dala haat iha lezada nia hasan parte loos. Bazeia ba faktu provadu sira ne'e no tetu mos sirkunstansia hotu-hotu ne'ebé haleu iha krime ne'e, tribunál konklui no kondena arguidu ho pena prizaun fulan neen suspende ba tinan ida.

20. Krime ofensa ba integridade fizika simples ho natureza violensia doméstika

Nú. Prosesu : 0024/20 CVSLL
Kompozisaun Tribunál : Singulár
Juis : Dra. Patricia de Araujo F.B.M. Xavier
Prokurador : Dr. Rafael Jeronimo Gusmão
Defeza : Dr. Domingos dos Santos
Desizaun : Pena Admoestasaun

Iha 28 Jullu 2020 Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violensia doméstika ne'ebé envolve arguida DdA hasoru nia la'en, iha Munisípiu Covalima.

Akuzasaun Prokurador

Prokurador akuza katak iha 30 Marsu 2020, iha oras tuku 18:00 lokraik, lezadu nia kolega bolu lezadu ba hemu tua iha kolega ne'e nia uma no durante sira hemu tua

lezadu nia kolega ne'e hateten ba lezadu katak nia toba ona ho lezadu nia feen. Lezadu fila ba uma no husu tuir ba arguida maibé arguida hatan ba lezadu atu lalika fi'ar ema lanu nia ko'alia. Rona resposta ne'e, lezadu mós la ko'alia tan buat ruma no deside atu halai fila ba nia inan-aman nia uma maibé arguida hako'ak metin lezadu. Lezadu konsege kore-an no halai sai ba liur. Arguida halai tuir lezadu no foti fatuk natoon tolu no tuda fatuk primeiru kona iha lezadu nia kidan parte karuk, fatuk segundu la kona no terseiru kona iha lezadu nia knosen rezulta moras iha kidan no knosen.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguida konfesa integralmente ba faktu sira iha akuzasaun no deklarata katak arrepende ninia hahalok. Arguida mós deklarata katak foin primeiravés mai hatan iha tribunál, husu ona diskulpa ba lezadu no promete sei la repete tan hahalok ne'e iha futuru.

Tribunál presinde la rona ona lezadu nia deklarasaun tanba arguida konfesa faktu sira hotu (artigu 268 alinea 4 KPP).

Alegasaun finál

Prokuradór konsidera arguida provadu komete krime tuir faktu sira iha akuzasaun. Maibé tanba arguidu foin primeravés mai hatan iha tribunál, nune'e husu ba tribunál kondena arguida ho pena multa US\$30.00.

Enkuantu defeza husu ba tribunál atu konsidera arguida nia konfisaun, primeiravés mai hatan iha tribunál, arrepende ninia hahalok no promete sei la halo tan hahalok ne'e iha futuru, tanba ne'e husu ba tribunál atu aplika pena admoestasaun.

Desizaun

Tribunál prova katak arguida tuda lezadu ho fatuk no kona iha kidan parte karuk no knosen. Bazeia ba faktu provadu sira ne'e no tetu mós sirkuntánsia hotu-hotu ne'ebé asociadu ba krime ne'e, tribunál konklui no kondena arguida ho pena admoestasaun.

12. Krime ofensa ba integridade fízika simples ho natureza violénsia doméstika

Nú. Prosesu : 0086/18 PDSUA

Kompozisaun Tribunál : Singulár

Juis : Dr. Benjamin Barros

Prokuradór : Dr. Napoleão Soares da Silva
Defeza : Dr. Albano Maia
Desizaun : Pena prizaun fulan 3 suspende ba tinan 1

Iha 29 Jullu 2020 Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RdC hasoru nia feen, iha Distritu Suai.

Akuzasaun Prokuradór

Prokuradór akuza katak iha 14 Juñu 2018, iha oras tuku 12:00 meiodia, arguidu husu osan US\$2.00 ba lezada atu sosa sigaru maibé lezada hatan katak "*osan la iha se hakarak fuma sigaru ba husu iha ó nia inan-aman*". Ho nune'e, arguidu basa dala lima iha lezada nia hasan parte loos no tebe dala ida iha lezada nia kotuk laran halo lezada monu ba rai. Aktu sira ne'e rezulta moras iha lezada nia kotuk laran no hasan parte loos sofre mean.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklarara parsialmente katak faktu sira balun loos no balun la loos. Arguidu deklarara katak nia basa dala rua la'os dala lima no tebe dala ida maibé la kona lezada. Maski nune'e, arguidu arrepende ona ninia hahalok no promete iha futuru sei la repete tan ninia hahalok ne'e.

Aleinde ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun katak antes ne'e arguidu nunka baku lezada no depoisode akontesimentu ne'e, arguidu la baku ona lezada to'o agora. Lezada hatutan katak arguidu abandona nia oan sira to'o ohin laron tanba arguidu hola ona fetu seluk. Ho nune'e, perante tribunal, lezada husu atu arguidu responsável ba nia oan sira.

Testemuña FM nu'udar arguida nia inan depoimenta katak arguidu baku de'it lezada dala rua iha lezada nia hasan parte loos to'o mean no tebe dala ida iha lezada nia ain-kabun.

Alegasaun finál

Prokuradór mantein nia akuzasaun tanba konsidera arguidu provadu komete krime ofensa ba integridade fízika simples tuir faktu sira iha akuzasaun, nune'e husu ba tribunál atu kondena arguidu ho pena prizaun tinan rua suspende ba tinan tolu.

Enkuantu defeza husu ba tribunál atu konsidera arguidu nia deklarasaun ne'ebé deklarata katak agresaun ne'e mosu tanba lezada mak provoka. Aleinde ne'e, husu mós ba tribunal atu konsidera sirkunstánsia atenuante sira hanesan arguidu konfesa ba faktu sira hotu no di'ak malu ona ho lezada. Bazeia ba konsiderasaun sira ne'e, husu ba tribunál kondena arguidu ho pena prizaun maibé suspende nia ezekusaun.

Desizaun

Depoisde avalia faktu sira hotu, tribunál prova katak arguidu basa dala lima iha lezada nia hasan parte loos no tebe dala ida iha lezada nia kotuk laran halo lezada monu ba rai. Bazeia ba faktu provadu ne'e no tetu mós sirkunstánsia hotu-hotu ne'ebé haleu krime ne'e, tribunál konklui no kondena arguidu ho pena prizaun fulan tolu sespemde ba tinan ida.

13. Krime ofensa integridade fizika simples ho natureza violénsia doméstika

Nú. Prosesu : 0034/19. PDSUA
Kompozisaun Tribunál : Singulár
Juis : Dr. Jose Maria Araújo
Prokuradór : Dr. Napoleão Soares da Silva
Defeza : Dr. Albino de Jesus Pereira
Desizaun : Absolve

Iha 29 Jullu 2020, Tribunál Distritál Suai prezide julgamentu ba krime ofensa ba integridade fizika simples ho natureza violénsia doméstika ne'ebé envolve arguidu SG hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 27 Feveireiru 2019, iha oras tuku 07:00 dadeer, lezada fakar bee foer ba arguidu. Ho nune'e, arguidu foti fali bee foer no fakar fali ba lezada no tuku dala barak iha lezada nia inus no basa dala barak iha lezada nia hasan parte loos no karuk. Aktu sira ne'e rezulta inus ran, hasan parte karuk mean no halo lezada oin nakukun.

Prokuradór akuza arguidu kontra artigu 145 KP kona-ba ofensa integridade fizika simple ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente no deklarata katak bainhira arguidu atu ba hariis, lezada fakar bee foer no atu kona fali arguidu. Ho nune'e arguidu foti fali bee

foer no rega fali ba lezada. Arguidu mós deklara katak nia la baku lezada. Antes ne'e lezada nia inus ran ona no moras tanba matebian tama iha lezada. Arguidu hatutan katak momentu lezada nia inus ran ne'e arguidu foti tisu no hamoos ran ne'e no lori lezada ba ospital Maliana.

Entretantu lezada deklara katak nia fakar duni bee foer maibe la'os atu fakar ba arguidu. Lezada mós konfirma arguidu nia deklarasaun katak arguidu la baku no la tuku lezada. Lezada nia inus antes ne'e ran ona no momentu lezada nia inus ran ne'e arguidu foti tisu hodi hamoos no lori lezada ba ospital hodi halo tratamentu.

Testemuña DdS (pesoa ne'ebé serbisu iha PRADET) depoimenta katak lezada ba iha PRADET no konta sai kona-ba akontesimentu ne'e katak arguidu basa lezada nia hasan no testemuña halo ezaminasaun hatudu katak lezada nia hasan mean no iha duni liman fatin.

Testemuña SPG (arguidu no lezada sira nia oan) depoimenta katak nia la haree lezada lori bee foer fakar ba arguidu no la haree arguidu baku lezada. Testemuña mós haktuir katak lezada nia inus ran ne'e tanba moras la'os tanba arguidu baku. Testemuña hatutan katak arguidu no lezada di'ak malu to'o agora.

Enkuantu testemuña LGL nu'udar ema ne'ebé halo kurativu liuhusi reza depoimenta katak testemuña hetan kontaktu husi arguidu atu ajuda halo tratamentu ka halo kurativu ba lezada. Testemuña hatutan katak nia reza dala rua ona ba lezada tanba moras nakdedar. Rezultadu husi tratamentu ne'e, agora daudaun lezada di'ak ona. Testemuña la hatene kona-ba lezada nia inus ran.

Alegasaun finál

Prokurador haktuir katak mezmu arguidu konfesa parsialmente ba faktu sira no deklara katak nia fakar bee ba lezada maibe la tuku no la basa lezada. Arguidu hatutan katak lezada sempre moras tanba matebian tama lezada. Entretantu lezada konfirma katak kuandu lezada moras nia inus sempre ran sai. Lezada mós konfirma katak iha tempu ne'ebá arguidu kaer iha lezada nia hasan rua mak dada no konfirma mós rezultadu ezaminasaun médiku ne'ebé halo husi testemuña DdS katak lezada nia hasan parte karuk mean (hatudu mós iha fotografia), iha liman kukun fatin no lezada dehan ba testemuña katak arguidu mak baku.

Enkuantu testemuña SPG nu'udar arguidu no lezada nia oan depoimenta katak la haree akontesimentu. Testemuna LGL depoimenta katak momentu lezada moras no ba reza dala rua.

Prokuradór konsidera no fiar katak iha tempu ne'ebá arguidu halo agresaun hasoru lezada no testemuña sira konfirma, nune'e husu ba tribunál atu halo alterasaun ba suspensaun ba pena ne'ebé antes ne'e tribunál aplika ba arguidu relasiona ho krime seluk ho natureza violénsia doméstika no aplika fali pena prizaun efetiva tinan 1 ba arguidu.

Enkuantu defeza haktuir katak momentu akontese ne'e lezada mak fakar bee foer ba arguidu depois arguidu foti bee foer ne'e fakar fali ba lezada. Iha parte seluk, lezada hateten katak momentu ne'e arguidu la basa, la tuku, no lezada hateten mós katak baibain nia moras sempre inus ran nune'e mós konfirma ho testemuña sira (lezada ho arguidu nia oan) no testamuña LGL nia depoimentu nune'e husu ba tribunál absolve arguidu.

Desizaun

Depoisde avalia faktu hotu ne'ebe prodús durante julgamentu, tribunál dúvida ho deklarasaun no depoimentu husi interveniente sira ne'e. Ho dúvida sira ne'e, tribunál absolve arguidu husi krime ne'e.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>